

**Kommunit sisamaasut akornanni Nunaqarfinni Aqutsisut akisussaaffiinik
pisinnaatitaaneqarnerannillu assigiaarnerusumik atorneqartussaatinnissaat qanoq
anguniarneqarsinnaanersoq pillugu oqallisisssiatut siunnersuut.**

(Inatsisartunut ilaasortat Sara Olsvig aammalu Ane Hansen, Inuit Ataqatigiit)

Akissuteqaat

(Naalakkersuisut Siulittaasuat)

Siullermeerneqarnera

Naalakkersuisut sinnerlugit siunnersuuteqartut sammisamik tamatuminnga eqqartuinissatsinnut periarfissiinerannut qutsavigissavakka.

Siunnersuuteqartut oqarnerattut kommunit aqunneqarnerat pillugu inatsimmi aalajangersakkat nunaqarfimmi aqutsisut atuunnerannut malittarisassanik aalajangersaaffiupput.

Kommunalbestyrelsinit inassuteqarnerup kingorna nunaqarfinnut tunngasut nunaqarfinni aqutsisunit aqunneqarput. Taamaammat aalajangersarneqarpoq communalbestyrelse tassaasoq nunaqarfimmi aqutsisut suleriaasianni nunaqarfimmi aqutsisut suliaannut malittarisassiortuusoq, soorlu aamma aalajangersarneqartoq communalbestyrelsimit akuersisoqqaartinnagu nunaqarfimmi aqutsisut aningaasartuuteqassangitsut.

Imaappoq communalbestyrelsit nunaqarfimmi aqutsisut atuunnerisa akisussaaffiisalu annertussusaannut akisussasausut taamatuttaaq communalbestyrelsit kommunit aningaasaqarnerat atuuttunerallu akisussaaffigivaat. Inatsisini malittarisassiortoqarpoq kommunit namminersornerat ataqqillugu, taamaattorli inatsisini malittarisassat allanngortinneqarsinnaapput. Nunaqarfimmi aqutsisut piginnaatitaanerulissappata tamatumani aqutsineq pillugu inatsimmi allannguisoqartariaqarpoq. Tamanna eqqartussallugu naapertuussinnaavoq.

Soorlu inatsisartut nalunngikkaat Naalakkersuisut kommunillu maanna aaqqissugaanermik aaqqissusseqqinnermik naliliinialeruttorput. Aaqqissuussaanermik aaqqissusseqqinnerup najukkani oqartussaaqataanermut kinguneri naliliinermut tamarmiusumut ilaatinneqassapput. Misissuinerup taassuma inernerri suli naammassinngillat naliliigallarnerilli ilaatigut takutippaat illoqarfifit pingaarcerit avataanni innuttaasut naliliisut najukkani oqartussaaqataaneq ajornerulersimasoq.

Taamaattumik nunaqarfimmi aqutsisut akisussaaffiisa pisinnaatitaanerisalu, kiisalu kommunit najukkani aqutsisunik illoqarfinniluunniit kommuniusimasuni "illoqarfinnut aqutsisunik" pilersitsinissaat eqqartussallugit naapertuutissaq. Kommunimmik ullumikkut tamatumunnga pisussaaffeqanngillat taamaallaalli communalbestyrelsit kissaatigissappassuk najukkani siunnersuisoqatigiinnik pilersitsisinnaallutik.

Tamatumunnga peqatigitillugu naliliisoqartariaqarpoq naleqquttuunersoq inatsimmi kommunalbestyrelsit nunaqarfinni aqutsisunut najukkanilu aqutsisuuinnaasunut akisussaaffiliillutillu pisinnaatitaaffiliisinnaassanersut. Ullumikkummi taamaattoqanngilaq. Naalakkersuisut suliassaqarfimmik naliliinissamut piareersimapput, maannali kommunalbestyrelsit najukkani pisinnaatitaaffinnik aalajangersaasuunerat allanngortissallugu tunngavissaqarsorinatik. Tamanna aamma kommunit namminneq aalajangiisinjaatitaanerannut Naalakkersuisunit ataqqineqartumut atasutut isigineqassaaq.

Aqutsineq pillugu inatsimmi periarfissiisoqarpoq kommunalbestyrelse nunaqarfinni aqutsisunut aningasanik atugassiisinnaasoq nammineq aalajangiineq naapertorlugu atorneqartussanik, soorlu ass. kulturimut innuttaasunillu paasitsinsiaanermut, timersornermut, teknikimik ingerlatsinermut pilersuinermullu, najukkami inuussutissarsiutitigut suliniutinut isumaginninnikkullu ingerlatanut. Kommunit suliassaqarfiit allat pillugit namminneerlutik naliliisinjaatitaapput, soorlu ass. najukkami sullissiveqarfinni il.il. atorfinnik inuttaliinernut il.il. tunngatillugu najukkani aqutsisunut suliakkiisoqarsinnaalluni.

Najukkamili aqutsisut akisussaaffinnik pisinnaatitaaffinnillu isumaginninnerat eqqartortillugu aamma najukkami piginnaasat eqqartorneqartariaqarput. Akisussaaffinnik pisinnaatitaaffinnillu isumaginninnermi naapertuuttunik piginnaasaqarnissaq pisariaqarpoq.

Pisortani suliassanik isumaginninneq suliassat pitsaanerpaamik isumagineqarfissaanni pisariaqarpoq, inuttut aningaasaqarnikkullu pitsaanerpaamik nukissanik atuinikkut, suliatigut piginnaasaqarluarneq tunuliaqtalarlugu, kiisalu innuttaasunik sullissineq inatsisitigullu illersugaaneq pingaernerpaatillugit.

Naalakkersuisut aaqqissugaanermik aaqqissusseqqinermik naliliinermut atatillugu najukkami oqartussaaqataanermik nukittorsaanissamut periarfissanik naliliiniarput, tassunga ilanngullugu nunaqarfinni aqutsisut pisinnaatitaaffiinik akisussaaffiinillu assigiinnerusumik paasinninnissaq piviusunngortitsinissarlu qularnaarniarlugu periarfissat naliliiffigissallugit.

Taamatut oqaaseqarlunga Inatsisartuni oqallinnissaq qilanaaraara.